

DIRÌZ, PROMESSIS E FAZ

In barbe a dutis lis promessis fatis in momenz critics e in barbe es disposizions consacradis in documenz internazionai e te stesse Cjarte Costituzionâl de Republiche taliane, il guviâr di Rome al fâs e al lasse fâ dutis lis prepotenzis cuintri la popolazion taliane di lenghe slave des nestris dôs provincis; e massime sul cont des scuelis e de lenghe. E nol è di dî che si trati di cuintripropagande di partît parcè che a' vegnin colpîz duc' i zitadins de minoranze alògine, ancje chei che, optant pa zitàdinanze taliane a' mòstrin di vê miôr restâ su la tiare dai lôr paris che no lâ te vizine republiche federative sot di un guviâr di colôr ros.

Ultimamentri un òrdin dal Ministeri talian de Publiche Istruzion al Proveditôr dai Studis di Gurizze al improibìs a chei sclâs che domandant la zitàdinanze taliane a' declarin di savê doprâ la lenghe taliane, di mandâ i lôr fruz tes scuelis indulà che si insegne sclâf. Al ven a stai che, par chei di Rome, il domandâ di restâ sot il guviâr talian al ûl dî rinunziâ `e proprie lenghe. A olê fâ lis robis justis, alore, ancje a chei che àn declarât di dopra la lenghe slave si vares d'improibî di jentrâ in tune scuele dulà che s'insegne par talian.

Ma chest no lu fâs nancje il guviâr di Tito! Invezzi culì si cîr di fâ pore e si fâsin pressions di ogni fate sui zitadins di lenghe slave par obleâju a mandâ i fruz tes scuelis talianis, che dal sigûr a' pènsin a sglonfâur i budiei di chês balis nazionalistichis che `o vin scugnût gloti ancje noaltris ai nestris timps. Al ven a stai che si va indenant nè plui nè mancûl cui stes criteris e cui stes miez d'in chês volte dal manarin. E se la minoranze slave `e domande chês paritàt di diriz e il tratament che fo garantide tantis voltis, se domande che lis scuelis a' vegnin sistemadis cun tune legislazion stabil, se mânde vie a Rome protestis, domandis, prejeris e memoriai `e pò stâ ben sigure ch'al è timp strassât: Rome `e je sorde di chês orele; Rome `e je usade a prometi e a no mantignî.

Nissun in chest mont nol è tant pûar di no podê fâ promessis!... Ma i sclâs a' sbàglin strade: che lassin stâ i tratâz di pâs e i articui de Costituzion, che provin a fâ une colete e che vâdin a Rome cun qualchi centenâr di cjartis di mil... Cui sa?... No s'impènsino di ce ch'al diseve Jugurta: *Romae omnia venalia esse ...?*

Patrie dal Friûl, n. 1, 1/15 di Zenâr 1950